

Isontina Ambiente e ARLeF: la educazion ambientâl si fâs ancje in marilenghe

La racuelte diferenziade spiegade par furlan midiant di une APP, il calendari e dut il materiâl di comunicazion. Presentâts i progjets a un an dal Protocol di Intese firmât tra i doi ents cul fin di promovi l'ûs de lenghe furlane intes ativitâts di comunicazion istituzionâl de aziende publiche dal Friûl orientâl.

Isontina Ambiente srl, la societât publiche che, cun 75 dipendents direts, e gjestis il cicli integrât dai refudums intai 25 comuns de provincie di Gurize (e in 3 de provincie di Triest) cjapant dentri 170mil abitants, e **ARLeF** (Agjenzie Regjonâl pe Lenghe Furlane), a àn presentât vuê i risultâts di une **sinergie nassude un an indaûr par valorizâ il plurilinguism e, in particolâr, l'ûs de lenghe furlane tes ativitâts davueltis de aziende gurizane** e in cetancj aspiets cuotidianis.

“Nus jere clâr di simpri – al declare Roberto SILLI Aministradôr Unic di Isontina Ambiente - che une societât tant che la nestre che e jentre ogni di a cjase di dutis lis fameis e ves il dovê morâl di cjâlâ cun atenzion, dant il massim risalt, a ogni singule particolaritât dal so bacin di riferiment prontant struments e modalitâts di confront che a semplificassin simpri di plui il contat cu la proprie utence, no dome daûr de normative in vore ma soledut inte otiche di favorî la miôr condivizion de culture ambientâl. Cumò, dopo un an di impegn e un lavôr capilâr, che o vin podût puartâ indenand in graciis dal supuart costant de ARLeF, o vin trasformât lis buinis intenzions in struments di comunicazion concrets, che dal sigûr a contribuiran a dâ ancjemò plui sburt al impegn dai utents singui intes operations cuotidianis di selezion dai lôr refudums”.

Chest an il **calendari** che Isontina Ambiente di passe dîs agns e consegne a ducj i siei utents cjase par cjase, e che in maniere simpatiche e legre, al da ai utents informazions utilis su la racuelte diferenziade e lis zornadis di conferiment dai diviers materiâi, al è stât fat ancje in lenghe furlane. Cemût fâ par vèlu? Al pues jessi ritirât li de sede ISA e tai siei sportei o domandât clamant il numar 800844344 e scrivint a segreteria@isontinambiente.it, e po ISA e proviodarà a mandâlu daûr des modalitâts definidis cul utent.

La lenghe furlane e je protagoniste ancje di altris impuartants materiâi di comunicazion: cul calendari chest an Isontina Ambiente e à fat rivâ cjase par cjase a ducj i utents de provincie di Gurize la **RICICLOPEDIA**, un pro memoria util par vè une rispueste precise a ogni dubi relatîf aes regulis pal coret conferiment dai materiâi intai singui contignidôrs.

Cun di plui a son stâts prontâts in lenghe furlane ancje i **adesîfs** metûts su lis cjampanis stradâls pe racuelte dal veri, sui bidons condominiâi logâts intes proprietâts privadis e sui mastei distribuîts aes fameis pal conferiment dal umit. Biel che, chescj ultins, a vegnin za dâts fûr ai gnûfs utents, par chei altris contignidôrs il plan di sostituzion dai materiâi di comunicazion esistents cun chei scrits ancje in lenghe furlane, al larà pâr a pâr cui intervents specifics programâts di Isontina Ambiente intai mês che a vegnin, intai diviers comuns dal teritori interessât.

Tra lis novitâts presentadis, par finî, e à dismovût grant interès la gnove **APP** creade di Isontina Ambiente: un strument - disponibil par iOS e par Android – une vore bon par vê simpri sot man no dome la rispueste a ogni dubi su la racuelte diferenziade, ma ancje par cognossi il calendari dai conferiments - diviers di Comun in Comun – dulà che a son i centris e lis isulis di racuelte e... par cjatâ ancje cetantis ricetis par creâ plats saurîts tornant a doprâ i vanzums alimentârs, e par prenotâ il servizi di ritîr a domicili dal vert e dai refudums di grandis dimensions.

La ARLeF, midiant dal so President, si è declarade une vore sodisfate dal percors interessant tacât adun cun Isontina Ambiente par favorî l'ûs de lenghe furlane inte suaze dal servizi public di gjestion ambientâl, cjapant dentri in maniere direte miârs di utents, garantint il rispiet dai dirits linguistics e metint in vore un "model" virtuôs che si incuadre ad implen intal percors di politiche linguistiche definîr de Leç Regionâl 29/07 e dal Plan Gjenerâl di Politiche Linguistiche aprovât de Region. I doi ents, duncje, a àn confermât in maniere mutuâl la volontât di lâ indevant in chest percors virtuôs di culture ambientâl e culture di promovion linguistiche. La ARLeF, intal specific, e larà indevant a dâ la consulence tecniche in materie di politiche linguistiche; a furnî il servizi di traduzion dai tescj e il so supuart pe realizazion des iniziativis previodudis.

Roncjîs di Monfalcon – Gurize, ai 15 di Fevrâr dal 2018